



Naalackersuisut ilaasortanik qinersisarneq pillugu
(Naalackersuisut siulittaasuat)

Karl Lyberthimik soraarsitsinerup ersarissumik takutippaa, Naalackersuisuni suna akorngutaanersoq. Nunarput massakkoqqissaaq Naalackersuisoqarpoq kammalaatiminik iluaquusiisartunik qanigisaminnillu atorfinitsisartunik aamma peqaataanik imminut iluaquusersorniarlutik innuttaasunut Inatsisartunullu salloqittaarinnippot eqqunngitsunillu paasissutisseeqattaarlutik. Tamanna pisariaqanngikkaluarpoq. Aamma taamatut pissusilersorneq tunngavinnut naliginnaasunut demokratiskiusunut akerliuvoq.

Utertoorneruvoq kammalaammik atorfinitsitsinerup Siumup gruppia pisarimmagu. Siumut gruppiata Naalackersuisut atuutileramilli kammalaatiminnik atorfinitsitsiortornerit allat tupinnaannartumik isiginngitsuusaarsimavai. Taamatulli oqareeluta Demokraatini iluarisimaarparput, tamanna kammalaatinik imaluunniit qanigisanik atorfinitsitsisarnerit akueriumaneerunnerannik isumaqassappat. Qularpugulli tamatumap uppersaatissaqalernissaata tungaanut.

Kammalaatinilli qanigisanillu atorfinitsisarnerit Naalackersuisoqatigiit akorngutiginnigilaat. Oqareennittut aamma unneqqarinneq atorneqanngilaq. Naalackersuisoqatigiinni Naalackersuisut Siulittaasuat salluliornerarneqarpoq aamma Naalackersuisuni ilaasortat allat eqqortoq oqaatiguminaatsittarpaat. Eqqunngitsunik paasissutissiisarneq salluliornerillu naammattut pereerput.

Naalackersuisullu isumaqartuarsinnanunerunik innuttaasunit tapersersorneqarlutik taava isumaqarpunga matup silataa alakkalaartariaqaraat, annertuumimmi akerliussutsimik takutitsisoqarpoq.

Politikkit eqqarsaatigalugu suna tamarmik tukappoq. Aningaasanut Inatsisip suliarinera pisuusaaneruvoq. Ungasinnerusoq isigalugu politikkeqartoqanngilaq. Naleraqartoqanngilaq. Pisut tamarmik pippot ullormiit ullormut.

Ullumikkut ataatsimiippugut naalackersuisoqatigiit Finn Karlsen, Aalisarnermut, Piniarnermut Nunalerinermullu Naalackersuisutut ivertinniassammassuk. Taamatut aamma atorfeqarnikuuvoq piffissami 2005-miit 2009-mut. Iluatsitsinngivippoq taamaattumik Demokraatini takujuminaatsipparput mannakkut qanoq ililluni torrallaanerussanersoq.

Atagu kingumut qivialaariartigu Finn Karlsenip kingullermik Aalisarnermut, Piniarnermut Nunalerinermullu Naalackersuisutut atuunna.

- Finn Karlseip Royal Greenlandimi aningaasarliornerujussuaq ilisimasaqarfiginngilaa, tamatuma kinguneranik Naalackersuisunngorlaat 2009-mi aasakkut allatut ajornartumik ingerlatseqatigiiffissuaq milliartip affaanik aningaasaliiffigaa. Taamaattumik taannaannarluunniit pissutigalugu



toqqissisimanangilaq, Finn Karlseip aalisarnermut akisussanngorteqqinneqarnera.

-Finn Karlsten arlaleriarluni ilisimatuut innersuussutaannut akerliusunik iliuuseqaqattaarpoq taamaattumik pisuussutigut immeraassutigai.

- Finn Karlsten torrallaangivippoq Canadameersunik puisup amiinik eqqusseqqusiunnaarami kinguninnguali atorunnaarseqqitamini. Aalisarnermut, piniarnermut Nunalerinermullu Naalakkersuisup taamatut pitsaanngitsuliornera pissutaaqataasimaqqooqaaq puisinniarnep annertunerusumik sammineqalerneranut ilaatigut alianartumik EU-p puisip amiinik eqqusseqqusiunnaarneranik kinguneqartumik.

- Kingullermik Aalisarnermut, piniarnermut Nunalerinermullu Naalakkersuisuutilluni arlaleriarluni Finn Karlsten tatigineqannginnini pissutigalugu taasissutigineqaqattaarpoq ilaatigut pissutaalluni maani oqaluttarfimmiit eqqunngitsumik oqalunnera.

Demokraatini sooruna siulittuisinnaangilagut. Nalunarput Finn Karlsten, Aalisarnermut, piniarnermut Nunalerinermullu Naalakkersuisutut qanoq ingerlajumaarnersoq, pereersulli annilaamisaarnaqaat.

Oqaaserli annilaamisaarneq atussallugu eqqornerpaajugunarpoq, qaammatit qulingiluat matuma siorna Siumut qinersinermi ajungaalluni pissaanermik ingerlatsisimanera allaaserissagukku. Taamaattumik Naalakkersuisut Siulittaasuata eqqarsaatigisariaqarunaraluarpa qinersititsiinnaruni pitsaanerunnginnersoq maannakkut takusarput Naalakkersuisumik taarsiineq unitsiinnarlugu.

Tassaapput Demokraatit massakkuugallartoq oqaaseriumasaat.